

Artigo primeiro.

Engádeselle un novo número 4 ó artigo 514 do Código penal, nos seguintes termos:

«4. Os que impediren o lexítimo exercicio das liberdades de reunión ou manifestación, ou perturbaren gravemente o desenvolvemento dunha reunión ou manifestación lícita serán castigados coa pena de prisión de dous a tres anos ou multa de doce a vinte e catro meses se os feitos se realizaren con violencia, e coa pena de arresto de sete a vinte e catro fins de semana ou multa de seis a doce meses se se cometeren mediante vías de feito ou calquera outro procedemento ilexítimo.»

Artigo segundo.

Engádeselle un novo número 5 ó artigo 514 do Código penal, nos seguintes termos:

«5. Os promotores ou directores de calquera reunión ou manifestación que convocaren, celebren ou intentaren celebrar de novo unha reunión ou manifestación que fose previamente suspendida ou prohibida, e sempre que con iso pretendesen subverter a orde constitucional ou alterar gravemente a paz pública, serán castigados coas penas de prisión de seis meses a un ano e multa de seis a doce meses, sen prexuízo da pena que puidese corresponder, se é o caso, conforme os números precedentes.»

Artigo terceiro.

Modifícase o artigo 170 do Código penal, que queda redactado nos seguintes termos:

«1. Se as ameazas dun mal que constituír delito fosen dirixidas a atemorizar aos habitantes dunha poboación, grupo étnico, cultural ou relixioso, ou colectivo social ou profesional, ou a calquera outro grupo de persoas, e tivesen a gravidade necesaria para conseguilo, imponense respectivamente as penas superiores en grao ás previstas no artigo anterior.

2. Serán castigados coa pena de arresto de sete a dezoito fins de semana, ou multa de seis a doce meses, os que, coa mesma finalidade e gravidade, reclamen publicamente a comisión de accións violentas por parte de bandas armadas, organizacións ou grupos terroristas.»

Artigo cuarto.

Modifícase o parágrafo segundo do artigo 790.1 da Lei de axuízamento criminal, que queda redactado nos seguintes termos:

«Non obstante, así que o xuíz de Instrucción considere que existen elementos abondos para formular a acusación por se teren practicado, se é o caso, as dilixencias a que se refire o número 3 do artigo 789, o traslado das actuacións ó Ministerio Fiscal e partes acusadoras efectuarase de forma inmediata, incluso no propio servizo de garda do Xulgado de Instrucción.»

Artigo quinto.

Modifícase o parágrafo terceiro do artigo 790.1 da Lei de axuízamento criminal, que queda redactado nos seguintes termos:

«Efectuado o traslado a que se refire o parágrafo anterior, o Ministerio Fiscal, en atención ás circuns-

tancias de flagrancia ou evidencia dos feitos, alarma social producida, detención do imputado ou aseguramento da súa posta á disposición xudicial, presentará no acto o seu escrito de acusación e solicitude de inmediata apertura do xuízo oral, con citación simultánea para a súa celebración.»

Disposición adicional única.

Os artigos 4 e 5 da presente lei teñen carácter de lei ordinaria.

Disposición derradeira única.

A presente lei entrará en vigor o día seguinte ó da súa publicación no «Boletín Oficial del Estado».

Por tanto,

Mando a tódolos españois, particulares e autoridades, que cumpran e fagan cumprir esta lei orgánica.

Madrid, 15 de xuño de 1998.

JUAN CARLOS R.

O presidente do Goberno,
JOSÉ MARÍA AZNAR LÓPEZ

14063 LEI ORGÁNICA 3/1998, do 15 de xuño, de modificación da Lei orgánica do réxime electoral xeral. («BOE» 143, de 16-6-1998.)

JUAN CARLOS I

REI DE ESPAÑA

Saiban tódolos que a viren e a entenderen
Que as Cortes Xerais aprobaron e eu sanciono a seguinte lei orgánica.

EXPOSICIÓN DE MOTIVOS

Como consecuencia da conveniencia política de reducir os excesivos gastos xerados polas convocatorias electorais, a Lei orgánica 13/1994, do 30 de marzo, modificou diversos artigos da Lei orgánica de réxime electoral xeral (LOREX), incorporando unha serie de medidas dirixidas a minorar directa ou indirectamente os gastos das campañas.

A periodicidade fixada legalmente para a celebración das eleccións municipais e autonómicas, comprendidas no artigo 42.3 da LOREX, e das eleccións ó Parlamento Europeo fai que en determinados anos coincidan nun breve espazo de tempo as convocatorias duns e outros procesos electorais, o que provocaría un solapamento das súas respectivas campañas e practicamente duplicaría, de maneira innecesaria, o custo delas, tanto as institucionais como das entidades políticas concorrentes.

Así, no ano 1999 producirase a coincidencia destes procesos electorais, as datas de celebración dos cales corresponderían ó 23 de maio e ó 13 de xuño, respectivamente.

Por todo iso, faise necesario acomete-la correspondente reforma da Lei orgánica do réxime electoral xeral que permita a acumulación e celebración conxunta das ditas eleccións naqueles anos nos que coincidan os citados procesos electorais.

Artigo único.

Engádesse a seguinte disposición na Lei orgánica do réxime electoral xeral:

«Disposición adicional quinta.

No suposto de que no mesmo ano coincidan para a súa celebración, nun espazo de tempo non superior a catro meses, eleccións locais, eleccións a asembleas legislativas de comunidades autónomas que celebraron as súas eleccións o cuarto domingo do mes de maio de 1995, coas eleccións ó Parlamento Europeo, os decretos de convocatoria expediranse o día quincuaxésimo quinto anterior ó da data en que han de ter lugar as eleccións ó Parlamento Europeo, para asegura-la celebración simultánea. Os referidos decretos publicaranse o día seguinte ó da súa expedición no "Boletín Oficial del Estado" ou, se é o caso, no "Boletín Oficial" da comunidade autónoma correspondente, e entrarán en vigor o mesmo día da súa publicación. Os mandatos dos membros das corporacións locais terminarán, en todo caso, o día anterior ó da celebración das seguintes eleccións.»

Por tanto,

Mando a tódolos españois, particulares e autoridades, que cumbran e fagan cumprir esta lei orgánica.

Madrid, 15 de xuño de 1998.

JUAN CARLOS R.

O presidente do Goberno,
JOSÉ MARÍA AZNAR LÓPEZ

14064 LEI 15/1998, do 15 de xuño, pola que se autoriza a participación do Reino de España na sexta reposición de recursos do Fondo Asiático de Desenvolvemento. («BOE» 143, de 16-6-1998.)

JUAN CARLOS I

REI DE ESPAÑA

Saiban tódolos que a viren e a entenderen

Que as Cortes Xerais aprobaron e eu sanciono a seguinte lei.

EXPOSICIÓN DE MOTIVOS

O Fondo Asiático de Desenvolvemento constitúe o núcleo de recursos que o Banco Asiático de Desenvolvemento prové en condicións concesionais ós seus países membros en desenvolvemento elixibles para el.

O Reino de España, que ingresou no Banco Asiático de Desenvolvemento o 14 de febreiro de 1986 pola Lei 44/1985, do 19 de decembro, realizou unha achega inicial no Fondo Asiático de Desenvolvemento de 4.335.000.000 de pesetas. Posteriormente participou na cuarta (FAsD-5) e quinta (FAsD-6) reposicións de recursos do dito fondo, autorizadas por Leis 6/1989, do 3 de abril, e 1/1993, do 8 de marzo. As cantidades achegadas a estas reposicións foron de 4.146.273.420 e 3.296.252.400 pesetas, respectivamente.

Esta sexta reposición (FAsD-7) ten por obxecto dotar de recursos ó Fondo Asiático de Desenvolvemento nunha contía de 6.300 millóns de dólares USA para o período 1997-2000.

Tanto razóns de índole asistencial como lexítimos intereses de política comercial aconsellan a participación de España nesta reposición de recursos.

A presente lei, que ten como fin autoriza-la dita participación, díctase en virtude dos títulos competenciais que a Constitución lle atribúe en exclusiva ó Estado, de acordo co artigo 149.1.3.^a e 13.^a, referidos ás relacións internacionais e as bases e a coordinación da economía.

Artigo 1. Achega ó Fondo Asiático de Desenvolvemento.

1. Autorízase ó Goberno para que, en nome do Reino de España, efectúe unha achega na sexta reposición de recursos do Fondo Asiático de Desenvolvemento por un importe de 1.669.693.500 pesetas, de acordo co disposto na Resolución número 247, aprobada pola Xunta de Gobernadores da dita institución o día 22 de marzo de 1997, que se publica como apéndice desta lei.

2. A citada achega será sufragada con cargo ó Fondo de Axuda ó Desenvolvemento.

Artigo 2. Pagamento das achegas.

1. Os pagamentos correspondentes á subscripción da achega denominaranse en pesetas e poderanse realizar en efectivo ou en forma de obrigas de pagamento non negociables e sen xuro, ou de obrigas análogas, pagadeiras á vista e ó seu valor á par.

2. Os pagamentos a título da subscripción que se realice de acordo co disposto na Resolución número 247 levaranse a cabo en catro cotas de importes iguais. O primeiro destes pagamentos efectuarase no momento do depósito do correspondente instrumento de subscripción. O segundo pagamento deberá efectuarse o 1 de novembro de 1998, non máis tarde. O terceiro pagamento, o 1 de novembro de 1999, non máis tarde. E o cuarto pagamento, o 31 de decembro do ano 2000, non máis tarde.

Artigo 3. Entidade depositaria.

Para efectos das achegas que se autorizan, o Banco de España desempeñará as funcións de depositario previstas no artigo 38 do convenio constitutivo do Banco Asiático de Desenvolvemento, tanto dos haberes e obrigas de pagamento necesarios para o desembolso das achegas, como dos seus títulos representativos.

Disposición derradeira primeira. Facultade de desenvolvemento.

Autorízase ó ministro de Asuntos Exteriores e ó ministro de Economía e Facenda para dictaren, no ámbito das súas respectivas competencias, cantas medidas sexan precisas para a execución do que dispón esta lei.

Disposición derradeira segunda. Entrada en vigor.

A presente lei entrará en vigor o día seguinte ó da súa publicación no «Boletín Oficial del Estado».

Por tanto,

Mando a tódolos españois, particulares e autoridades, que cumbran e fagan cumprir esta lei.

Madrid, 15 de xuño de 1998.

JUAN CARLOS R.

O presidente do Goberno,
JOSÉ MARÍA AZNAR LÓPEZ